



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
**Stručna služba za poslove Općinskog
vijeća i Općinskog načelnika**



Vogošća, ul. Jošanička br. 80, tel: 00387 33 586 413, 586-409, fax: 586-407, 586-444

Broj: 12-04-sl./24
Vogošća, 03.01.2025. godine

VIJEĆNIČKA PITANJA
POSTAVLJENA NA 2. REDOVNOJ SJEDNICI OPĆINSKOG VIJEĆA VOGOŠĆA
održanoj 30.12.2024. godine

Vijećnica **Džano Emina (u ime Kluba vijećnika NiP)** postavila je slijedeće vijećničko pitanje:

- 2/1.** Molim nadležnu službu da firmi koja je zadužena za zimsko održavanje puteva uputi pitanje zašto niti jednom nisu ušli u krakove ulice Mitra Šućura? Da bi situacija bila gora, čišćenjem glavnog dijela ulice zatrpani su ulazi u sporedne krakove. Prema informacijama koje sam dobila od naših sugrađana i sugrađanki, slična situacija je i u drugim naseljima.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

- 2/2.** Da li je novi sastav Općinskog vijeća upoznat da je Općina Vogošća pristupila eCitizen platformi? Odnosno kada ćemo kao vijećnici dobiti pristup navedenoj platformi na kojoj sugrađani već imaju mogućnost postaviti pitanje svakom vijećniku? Zašto se usvojeni materijali i dokumenti ne postavljaju, odnosno redovno ažuriraju nakon svake sjednice?

Obrazloženje:

21.10.2024. godine održana je primopredaja eCitizen platforme za tri partnerske jedinice lokalne samouprave, među kojima je i naša Općina Vogošća. Ovaj potez treba pohvaliti jer pristupanjem platformi jača se mogućnost transparentne i jednostavne komunikacije. Ova inovativna platforma će omogućiti efikasniju komunikaciju sa građanima, pružanjem jednostavnih alata za slanje žalbi i upita našoj lokalnoj samoupravi. Jedna od ključnih funkcionalnosti eCitizen platforme je mogućnost online učešća u javnim raspravama i sjednicama Općinskog vijeća. Građani mogu iznositi svoja mišljenja, komentarisati tačke sjednica, kao i postavljati direktna pitanja načelniku i vijećnicima. Također, aplikacija omogućava slanje pritužbi putem fotografija, što će olakšati identifikaciju problema u lokalnoj zajednici. Navedena aplikacija nudi mogućnost svim građanima da prate rad našeg Vijeća, dostavljaju komentare, učestvuju u javnim raspravama, postavljaju pitanja Načelniku ili vijećnicima, ali i da prijave problem. eCitizen daje mogućnost jednostavne i transparentne komunikacije građana i lokalne uprave. U praksi analizirajući rad ove platforme uočio sam da općine Busovača, Čapljina, Čitluk, Doboj Istok, Ilijaš, Trebinje, Tešanj, Tuzla redovno nakon svake sjednice postavljaju usvojene materijale i dokumente, a ne samo naslov. Idući u korak dalje Općina Tešanj je donijela odluku da uzima na sebe obavezu da u roku od 48 sati odgovori svakom građaninu. S tim u vezi upućujem navedeno pitanje kako bi otklonili nejasnoće i nedostake te pokazali da smo opredjeljeni svi zajedno da se podrže građanke i građani da aktivnije učestvuju u radu naše lokalne zajednice i na taj način da se doprinose rješavanju problema sa kojima se svakodnevno suočavaju.

- 2/3.** U kojoj je fazi usvojena inicijativa u predhodnom mandatu Općinskog vijeća za izgradnju ograđenog i izdvojenog parka za kućne ljubimce? Da li je Općina odredila lokaciju koja zadovoljava propisane kriterije i da li bi se isti nalazila u užem dijelu centra Vogošće ?

Obrazloženje:

Veliki broj građanki i građana Općine Vogošća su vlasnici barem jednog kućnog ljubimca, kojeg svakodnevno više puta na dan moraju izvoditi. Nažalost, nemamo statistiku da to izrazimo u procentima, te da na osnovu toga planiramo zadovoljenje njihovih potreba, ali je i bez nje vidljivo da smo kao općina potkapacitirani u tom smislu. Nemamo niti jedan park u našoj lokalnoj zajednici. S druge strane imamo problem s tim što je na sve većem broju travnatih površina zabranjeno uvođenje kućnih ljubimaca ali i činjenicu da imamo i ljude koji iz

bilo kojeg razloga ne žele pse u svojoj blizini. Zato je ovaj park od izuzetne važnosti. Svim svojim građanima i njihovim ljubimcima moramo pružiti osjećaj sigurnosti i ugone u javnom prostoru, te s tim u vezi upućujem navedeno vijećničko pitanje.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

2/4. Da li postoji mogućnost spajanja pješačke zone, odnosno izgradnje trotoara na dijelu glavnog puta Vogošća – Sarajevo M18, tačnije od autobuske stanice u Gornjem Hotonju duž magistralnog puta do Kobilje Glave, kako bi na tom dijelu dobili pješačku stazu koja bi povezivala ove dvije mjesne zajednice.

Obrazloženje:

Dio navedenog dijela ulice nema izgrađen trotoar ili pješačku stazu. Na tom lokalitetu se nalazi desetine kuća u kojima stanuje stotinjak stanovnika, kojima bi omogućili kvalitetniju komunikaciju. Po trenutnom stanju stanovnici koji koriste gradski prijevoz, trebaju se vratiti skroz unazad kod bivšeg restorana „Pariz“, te onda ponovo nazad prema svojim kućama. Ako postoji mogućnost da se izradi isti ili da se planira u narednom periodu.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

2/5. Ko je zadužen za čišćenje i održavanje Jošaničkog potoka i postoji li odredba koliko često se treba čistiti.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

2/6. Može li se pronaći adekvatna lokacija za formiranje groblja za naselje Blagovac.

Obrazloženje:

Željela da skrenem pažnju na važan, emotivan, ali i praktičan problem s kojim se suočavaju stanovnici naselja Blagovac. Nakon rata, došlo je do značajne promjene u strukturi stanovništva ovog naselja, koje je danas većinski muslimansko. Međutim, naselje Blagovac i dalje nema vlastito groblje, što za stanovnike predstavlja veliki izazov i osjećaj neispunjenih osnovnih potreba u zajednici. Postavljam pitanje možemo li zajedno pronaći rješenje. Konkretno, možemo li identificirati prostor za formiranje groblja unutar ili u blizini ovog naselja. Zašto je ovo važno?

1. Dostojanstvo i zajedništvo: pravo na dostojanstvenu sahranu bližnjih unutar zajednice osnova je ljudskih potreba i odraz poštovanja prema svim našim sugrađanima.
2. Praktične potrebe: putovanja do udaljenih groblja opterećuju porodice, naročito starije stanovnike. Imati lokalno groblje olakšalo bi ne samo logistiku, nego bi stvorilo osjećaj povezanosti sa zajednicom.
3. Promjena društvene slike: kao što su se demografske okolnosti promjenile, tako je došlo i vrijeme da naše infrastrukturne potrebe prate te promjene, kako bi smo osigurali ravnopravan i inkluzivan pristup osnovnim pravima svim građanima.

Svjesna sam da je riječ o izazovnom zadatku koji zahtjeva angažman različitih aktera. Stoga, predlažem da Vijeće donese odluku o inicijativi za identifikaciju i procjenu mogućih lokacija za ovo groblje, uz poštovanje prostornog plana i potreba lokalne zajednice. Stanovnici Blagovca to zaslužuju i vjerujem da ćemo pronaći zajednički put ka rješenju koje će donijeti korist svim stranama.

Vijećnik **Škoro Hamdija (u ime Kluba vijećnika Naprijed BiH)** postavio je slijedeće vijećničko pitanje:

2/7. U kojoj fazi je Regulacioni plan Centar, obzirom da je isti prošao proceduru javne rasprave, a isti nije dostavljen Općinskom vijeću na razmatranje i usvajanje.

Vijećnik **Piknjač Admir (u ime Kluba vijećnika NIP)** postavilo je slijedeće vijećničko pitanje:

2/8. Pitam nadležnu Općinsku službu koliko općinskih stanova posjeduje Općina Vogošća, ko su korisnici, koji su kriteriji za dobijanje na korištenje istih i koliko iznosi mjesečna kirija (naknada po kvadratu) iskazana u konvertibilnim markama za navedene stanove?

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

2/9. Molim vas da dostavite detaljan pismeni odgovor u vezi sa projektom I i II faze vodosnabdijevanja za naselja Krivoglavci i Svrake. Naime, stanovnike navedenog područja, zanima koliko je sredstava za realizaciju ovog projekta izdvojila Općina Vogošća, koliko su izdvojili KJKP „Vodovod i kanalizacija“ Sarajevo, te koliko su sredstava za ovaj projekat obezbijedili ostali nivoi vlasti, uključujući kantonalnu, federalnu i državnu razinu vlasti, ministarstva, kao i relevantna preduzeća, zaključno sa 30.09.2024.godine (trećim kvartalom).

2/10. Molim vas da dostavite detaljan pismeni odgovor u vezi sa projektom I i II faze vodosnabdijevanja za naselja Poturovići i Ljubina. Naime, stanovnike navedenog područja, zanima koliko je sredstava za realizaciju ovog projekta izdvojila Općina Vogošća, koliko su izdvojili KJKP „Vodovod i kanalizacija“ Sarajevo, te koliko su sredstava za ovaj projekat obezbijedili ostali nivoi vlasti, uključujući kantonalnu, federalnu i državnu razinu vlasti, ministarstva, kao i relevantna preduzeća, zaključno sa 30.09.2024.godine (trećim kvartalom)

Vijećnik **Pašagić Almir (u ime Kluba vijećnika SDP)** postavilo je slijedeća vijećnička pitanja:

2/11. Postavljam pitanje prema nadležnim službama Općine Vogošća sa sljedećim pitanjima:

- Koliko ima boračkih orhanizacija i udruženja vezanih za tematiku rata, sa tačnim nazivima na području općine Vogošća.
- Koliko pojedinačno ima članova u svakom udruženju i koliko se novca pojedinačno izdvaja za pomenuta udruženja iz Budžeta Općine Vogošća.
- Koje prostore udruženja koriste, lokacije i kvadratura tih poslovnih prostora i da li se za te prostore plaćaju naknade Općini Vogošća ili su oslobođeni plaćanja korištenja.

2/12. Postavljam pitanje prema nadležnim službama Općine Vogošća sa sljedećim pitanjima:

- Koliko ima poslovnih prostora na području općine Vogošća kojima raspolaže Općina Vogošća kao vlasnik.
- Koliko je poslovnih prostora izdato pod kiriju, a koliko je oslobođeno plaćanja kirije i navedite njihova imena i lokacije sa kvadraturom korištenja i visinom rente koja se plaća.
- Koliko je općinskih prostora na području općine Vogošća slobodno i navedite njihovu lokaciju i kvadraturu i razlog zbog čega su trenutno slobodni prostori.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA I OPĆINSKOG
NAČELNIKA

Melisa Kršo



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
**Stručna služba za poslove Općinskog
vijeća i Općinskog načelnika**



Vogošća, ul. Jošanička br. 80, tel: 00387 33 586 413, 586-409, fax: 586-407, 586-444

Broj: 12-04-sl./24

Vogošća, 03.01.2025. godine

**INICIJATIVE POKRENUTE
NA 2. REDOVNOJ SJEDNICI OPĆINSKOG VIJEĆA VOGOŠĆA
održanoj 30.12.2024. godine**

Na 2. redovnoj sjednici Općinskog vijeća vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

2/1. Pokrećem inicijativu da nadležna općinska služba hitno zatraži od JU Domovi zdravlja Kantona Sarajevo da se u Vogošći obezbjedi dovoljan broj doktora specijalista pedijataru, jer trenutno u Domu zdravlja Vogošća imamo jednog pedijatra, a u slučaju njegovog odsustva u Vogošći neće biti moguće obaviti pedijatrijski pregled. Molim nadležnu službu da se sa ovom inicijativom obrati i Ministarstvu zdravstva Kantona Sarajevo, kao i nadležnoj inspekciji kako bi se ovaj problem odmah riješio.

Obrazloženje:

Odlaskom određenog broja doktora specijalista pedijatrije u penziju kao i u druge zdravstvene ustanove, u našem Domu zdravlja radi trenutno jedan doktor pedijatar i stanje na odjelu pedijatrije u Domu zdravlja je doslovno rečeno haotično i nehumano prema djeci i roditeljima koji dolaze na pregled kod doktora pedijatra. Kao što sam i rekao u jednoj smjeni radi pomenuti doktor, dok u drugoj smjeni imamo doktora opšte prakse te se za pregled pedijatra stanovnici općine Vogošća upućuju u druge Domove zdravlja na području Kantona Sarajevo što je krajnje neodgovorno i bahato ponašanje prema građanima Vogošće i njihovoj djeci. Ovo stanje je nedopustivo i neodrživo. Zahtjevam da nadležna općinska služba odmah i hitno reaguje na ovaj problem.

Vijećnica **Briga Sanela (u ime Kluba vijećnika SDA)** pokrenula je slijedeću inicijativu:

2/2. Pokrećem inicijativu za postavljanje zaštitnih rukohvata na strmom dijelu ulice Barica, od broja 48. do broja 65.

Obrazloženje:

Na pomenutom dijelu ulice Barica od broja 48. do broja 65., postoji potreba za postavljanjem zaštitne ograde, odnosno rukohvata, zbog strmog terena koji u zimskim mjesecima postaje opasan usljed poledice. Ovaj dio ulice koristi veliki broj starijih osoba i osoba sa invaliditetom, koji bez adekvatne podrške pri kretanju ugrožavaju svoje zdravlje i sigurnost.

Vijećnik **Gljiva Avdo (u ime Kluba vijećnika DF)** pokrenuo je slijedeću inicijativu:

2/3. Pokrećem inicijativu za postavljanje zaštitne ograde (bankine) u naselju Uglješići kod kućnog broja 29. (kod rezervoara).

Obrazloženje:

U naselju Uglješići, na kraju ulice kod kućnog broja 29., u neposrednoj blizini rezervoara, postoji ozbiljna opasnost zbog izuzetno strme terenske konfiguracije. Ulica se završava blizu provalije, a trenutno ne postoje nikakve zaštitne mjere, što predstavlja rizik za sigurnost građana, posebno vozača koji koriste ovu ulicu. Bez postavljene zaštitne ograde (bankine), postoji realna mogućnost da vozila, zbog neprilagođene brzine, loših vremenskih uslova ili tehničkih problema, skliznu u provaliju, što bi moglo izazvati teške nesreće sa opasnim ishodima.

Vijećnica **Džano Emina (u ime Kluba vijećnika NiP)** pokrenula je slijedeću inicijativu:

- 2/4.** Pokrećem inicijativu prema nadležnoj općinskoj službi da se na ulazu u krak ulice Mitra Šućura, kod spomen-obilježja borcima Fočanske, postavi ogledalo.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 2/5.** Pokrećem inicijativu za digitalizaciju slanja materijala za sjednice i radna tijela Općinskog vijeća Vogošća.

Obrazloženje:

U prethodnom periodu prateći rad sjednica Općinskog vijeća ostao sam šokiran količinom materijala koji se printa za potrebe sjednica, posebno imajući u vidu da Grad Sarajevo, Općina Stari Grad i Općina Centar materijal za sjednicu i radna tijela šalju elektronskim putem. Također, uočio sam da sadašnjom praksom dosta troškova odlazi na štampanje materijala koji dobijamo za svaku sjednicu, plus pred svaku komisiju, ti materijali se šalju poštom mnogima, te takav način rada iziskuje određene finansijske izdatke Općine Vogošća. Upućujem vijećničku inicijativu za digitalizaciju ovog procesa, na osnovu kojeg bi Općina Vogošća uštedila 40.000,00 KM prelaskom na elektronsko slanje materijala. Ukupna sredstva za printanje i nabavku materijala nalaze se zbirno na ek. kodu 613 411- Izdaci za kancelarijski materijal za sve službe, tako da ne možemo utvrditi precizno ovaj podatak, ali je sigurno da bi se ova sredstva umanjila. Materijali koji se dostavljaju u printanoj formi na kućne adrese iziskuju troškove službenih vozila, goriva i vozača. Mislim da je vrijeme da idemo u korak s vremenom, a ujedno i štedimo. Moramo na svim stavkama u Općini na kojima možemo da uštedimo, to i uradimo. Pored štednje, još jedna od prednosti ove inicijative jeste ekološki momenat, koji je veoma značajan u današnje vrijeme, a navedenom inicijativom bi se smanjio veliki broj utrošenog papira.

- 2/6.** Pokrećem inicijativu za uspostavljanje "Građanskog sata sa vijećnicima Općinskog vijeća Vogošća".

Obrazloženje:

Navedenu inicijativu upućujem prvenstveno zbog potrebe da Općinu Vogošća učinimo transparentnijom, a rad vijećnica i vijećnika javnim – što je jedna i od obaveza prema ljudima koji su nas birali. Ovom inicijativom želimo osigurati predanost učešća Općinskog vijeća u konstruktivnom dijalogu sa građanima, obavezati se na kontinuiran rad Vijeća s ciljem kreiranja i uvođenja unapređenja sistema lokalne uprave koji će biti u najboljem interesu za građane općine Vogošća. Zadovoljan građanin mora biti naš prioritet. Inicijativa o uspostavljanju "Građanskog sata sa vijećnicima" se uspostavlja s mehanizmom komunikacije vijećnika Općinskog vijeća Vogošća s građanima kroz koji oni neposredno komuniciraju s vijećnicima o pitanjima, inicijativama i problematici u lokalnoj zajednici, a vijećnici s druge strane informišu građane o aktivnostima i planovima Općinskog vijeća Vogošća. Građanski sat bi se održavao svakog radnog petka, ukoliko ima prijavljenih građana, u periodu od 16 do 18 sati, uz mogućnost da vijećnik i građanin dogovore i neki drugi termin koji njima odgovara. Građanski sat se neće održati u slučaju da je u navedenom terminu zakazano održavanje sjednice Kolegija ili Općinskog vijeća Vogošća, o čemu će građani imati blagovremenu informaciju. Građani svoja pitanja, inicijative i primjedbe podnosili bi putem propisanog Zahtjeva koji bi se mogao preuzeti na info pultu Općine Vogošća, a isti bi se mogao preuzeti i sa oficijelne web stranice Općine Vogošća. Kada se Zahtjev popuni, predaje se na pisarnicu Općine Vogošća ili lično sekeretaru Općinskog vijeća putem e-mail adrese najkasnije tri dana prije održavanja "Građanskog sata sa vijećnicima" o čemu će sekretar Općinskog vijeća obavještavati predsjedavajućeg Općinskog vijeća Vogošća. Građani u svom Zahtjevu, pored teme, moraju naznačiti ime i prezime jednog ili više vijećnika s kojima žele razgovarati. Ukoliko građanin u Zahtjevu propusti ili ne naznači ime jednog ili više vijećnika, onda će Kolegij Općinskog vijeća Vogošća odrediti vijećnika/e za taj Građanski sat. Vijećnik ima obavezu da sasluša stranku na tom Građanskom satu, o tome lično sačini Zapisnik koji sadrži podatke koji se odnose na datum, mjesto i vrijeme održavanja Građanskog sata, imena prisutnih, Dnevni red i zaključke sa smjernicama za rješavanje navedenog problema. Zapisnik bi trebao da bude potpisan, kako od strane vijećnika, tako i od strane građana. Zapisnik bi se obavezno dostavljao sekretaru, nakon čega isti se prosljeđuje predsjedavajućem Općinskog vijeća Vogošća, a po potrebi i Općinskom načelniku na mišljenje. Vijećnici koji su održali sastanak s građanima, zajedno s predsjedavajućim Općinskog vijeća analiziraju materijale sa održanih sastanaka. Prijedlog građana predsjedavajući dostavlja Kolegiju Općinskog vijeća Vogošća radi procjene i eventualnog uvrštavanja u Dnevni red za sjednicu Općinskog vijeća Vogošća. Građani bi bili

informisani o povratnim informacijama i poduzetim aktivnostima koje su bile rezultat Građanskog sata. Posebno treba naglasiti da članom 176. Poslovnika Općinskog vijeća Vogošća određeno je i definisano postojanje građanskog sata sa vijećnicima kao izvora dvosmjernе komunikacije.

Vijećnik **Cvrk Ćamil (u ime Kluba vijećnika DF)** pokrenuo je slijedeću inicijativu:

2/7. Pokrećem inicijativu za postavljanje usporivača brzine (ležećih policajaca) ili traka za usporavanje brzine u ulici Jošanička, na dijelu od nove autobuske stanice do „Sofa“ marketa.

Obrazloženje:

Ulica Jošanička je jednosmjerna ulica koja iako ima ograničenje brzine, svakodnevno svjedoči o neodgovornom ponašanju vozača. Na pomenutom dijelu od nove autobuske stanice do „Sofa“ marketa, vozači često premašuju dozvoljenu brzinu, čime ugrožavaju sigurnost pješaka, uključujući djecu, starije osobe i druge ranjive skupine. Ovaj dio ulice, zbog blizine stajališta autobusa i marketa, predstavlja područje povećane opasnosti za pješake, koji se često nalaze na trotoaru i prelaze ulicu. Nažalost, neki nesavjesni vozači ne poštuju saobraćajna pravila i često ne reaguju na vrijeme kako bi smanjili brzinu, čime direktno ugoržavaju sigurnost građana. S obzirom na ove okolnosti, smatramo da bi postavljanje usporivača brzine ili traka za usporavanje brzine bilo izuzetno važno za povećanje sigurnosti svih učesnika u saobraćaju, kao i za smanjenje broja potencijalnih saobraćajnih nesreća na ovom dijelu ulice.

Vijećnik **Bogilović Enis (u ime Kluba vijećnika NiP)** pokrenuo je slijedeće inicijative:

2/8. Pokrećem inicijativu da se ulici Ejuba Delalića zamjeni ogledalo koje je polomljeno.

2/9. Pokrećem inicijativu da se u ulici Braće Kršo od autobuske stanice prema Općini zabrani parkiranje dužinom ulice.

Vijećnica **Curić Samira (u ime Kluba vijećnika SDP)** pokrenula je slijedeću inicijativu:

2/10. Pokrećem inicijativu za rekonstrukciju mosta od ulice Braće Kršo do Likvala.

Obrazloženje:

Željela bi skrenuti pažnju na problem koji pogađa pješake, naročito one koji svakodnevno koriste most kako bi stigli do autobuske stanice. Most o kojem je riječ trenutno nije prilagođen za pješački promet, što predstavlja ne samo neugodnost, već i potencijalni sigurnosni rizik za sve građane koji ga koriste. Stoga, predlažem inicijativu da se most rekonstruiše, kako bi postao isključivo pješački most. Konkretno, predlažem slijedeće korake:

1. Izrada projektne dokumentacije za prilagođavanje mosta pješačkom prometu.
2. Time bismo osigurali sigurniji i funkcionalniji prelazak pješaka prema autobuskoj stanici, što bi direktno doprinijelo boljoj povezanosti i pristupačnosti javnog saobraćaja za sve građane.

Ova inicijativa ima višestruke koristi:

- Povećanje sigurnosti: pješaci bi imali siguran prostor za prelazak, bez potrebe da se izlažu riziku na mostu koji nije predviđen za njih.
- Unepređenje mobilnosti: autobuska stanica postala bi mnogo pristupačnija širokom krugu korisnika, čime se podstiče korištenje javnog prijevoza.

Smatram da ovaj prijedlog nije samo koristan, nego i nužan kako bismo omogućili kvalitetnije i sigurnije uslove za naše građane.

Vijećnik **Pašić Edin (u ime Kluba vijećnika SDA)** pokrenuo je slijedeće inicijative:

2/11. Na zahtjev mještana naselja Orahov brijeg, pokrećem inicijativu prema Ministarstvu saobraćaja Kantona Sarajevo i „Centrotrans“ d.d. Sarajevo za uspostavljanje, odnosno proširenje reda vožnje i za dane vikenda na autobuskoj liniji Orahov brijeg-Sutjeska i Sutjeska-Orahov brijeg. Znatno broj mještana iskazao je potrebu za uvrštavanjem minibuskog prijevoza sa optimalnim brojem linija subotom i nedjeljom. Udaljenost od glavne saobraćajnice, različite potrebe stanovništva kako u gradu tako i u Vogošći u dane vikenda zahtijevaju uspostavu, odnosno proširenje postojećeg reda vožnje.

2/12. Obzirom na izostanak podrške u tekućoj godini, a na zahtjev vogošćanskih pčelara, pokrećem inicijativu prema Službi za privredu, integrisani lokalni razvoj i društvene djelatnosti da u skladu sa svojim mogućnostima, a sa ciljem podrške pčelarskoj proizvodnji, prvenstveno očuvanju

postojećeg pčelinjeg fonda podrži iste kroz finansiranje i sufinansiranje troškova kupovine prehrane za pčele u prvom trimjesečju u prvom tromjesečju 2025. godine. Opće je poznato da je izazov očuvanje pčelinjeg fonda u svijetu, a u nekoliko posljednjih godina zbog smanjenih prinosa pčelinjih proizvoda, pojave različitih bolesti i utjecaja na zdravlje pčela, broj zajednica se smanjuje. Usljed specifične pčelarske godine, prvenstveno zbog atmosferskih prilika koje su vladale u tekućoj godini, već su evidentni gubici na pčelinjacima vogošćanskih pčelara.

Vijećnik **Gljiva Eno (u ime Kluba vijećnika DF)** pokrenuo je slijedeću inicijativu:

2/13. Pokrećem inicijativu za postavljanje javne rasvjete u ulici Donja Jošanica I (od broja 194. do broja 222. i od broja 182. do broja 188.)

Obrazloženje:

Stanovnici ulice Donja Jošanica I, u dijelovima od broja 194. do broja 222. i od broja 182. do broja 188., svakodnevno se suočavaju sa nedostatkom adekvatne javne rasvjete. Ovaj problem značajno utiče na kvalitetu života, sigurnost građana i sigurnost u saobraćaju na ovom području, posebno u večernjim satima. Nedostatak rasvjete povećava rizik od saobraćajnih nesreća, otežava kretanje pješaka, posebno djece i starijih osoba, te predstavlja sigurnosni problem, jer smanjena vidljivost može olakšati izvršenje krivičnih djela poput krađa ili vandalizma. Postavljanjem javne rasvjete u ovim dijelovima ulice riješilo bi navedene probleme i doprinjelo većoj sigurnosti i boljoj povezanosti ovog dijela naselja sa centrom.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

2/14. Pokrećem inicijativu da se nadležna općinska služba obrati Ministarstvu za saobraćaj Kantona Sarajevo u smislu adekvatnog postavljanja horizontalne i vertikalne signalizacije na putnoj komunikaciji od kružnog toka Blagovac do naselja Tihovići.

Obrazloženje:

Postavljanjem adekvatne horizontalne i vertikalne signalizacije osigurava se sigurnost svih učesnika u saobraćaju. Samim tim se nivo sigurnosti podiže na viši nivo, a saobraćajnica dobiva urbaniji izgled.

2/15. Ponovo pokrećem inicijativu 38/8. koja je pokrenuta na 38. redovnoj sjednici Općinskog vijeća Vogošća 27.06.2024. godine u smislu poboljšanja saobraćaja na vogošćanskoj petlji i kružnom toku Vogošća – Semizovac - most za Sarajevo i Zenicu. Obzirom da nije dobiven odgovor na datu inicijativu, istu pokrećem ponovo.

Obrazloženje:

Građani koji koriste standardnu saobraćajnicu, odnosno ulaz u naselje Gornja Jošanica III, suočavaju se sa nizom problema pri ulasku i izlasku iz pomenutog naselja. Iz pravca Vogošće nije bezbjedno ući u prometnu ulicu zbog nagiba ceste. Prilikom uključenja na put M-18 sigurnost je upitna, potrebno je ogledalo.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

2/16. Pokrećem inicijativu za sanaciju ulice Braće Halać. Ulica je već duže vrijeme u lošem stanju zbog neodržavanja, ozbiljnog oštećenja što uzrokuje ozbiljne poteškoće u svakodnevnom životu stanovnika, kao i firmama koje iznajmljuju poslovne prostore u zanatskom centru, a koje se nalaze u pomenutoj ulici. Oštećenja ugrožavaju sigurnost svih sudionika u saobraćaju posebno školskoj djeci i roditeljima, koji na dnevnoj bazi tom ulicom prolaze u ogromnom broju vodeći i vraćajući djecu iz škole, kao i starijim i svim ostalim građanima koji prolaze tom ulicom. Zahtjevamo da nadležna općinska služba što prije razmotri i krene sa realizacijom ove inicijative.

2/17. Pokrećem inicijativu da se u ulici Branilaca Vijenca postave usporivači brzine. Nesavjesni vozači u pomenutoj ulici divljaju u saobraćaju i na taj način ugrožavaju sigurnost učesnika u saobraćaju kao i pješaka.

Vijećnik **Piknjač Admir (u ime Kluba vijećnika NIP)** pokrenuo je slijedeću inicijativu:

2/18. Pokrećem inicijativu da nadležna Općinska služba u naselju Ugorsko, mjesna zajednica Hotonj, pronađe adekvatnu lokaciju za dječije igralište, te pristupi izradi projektne dokumentacije i izgradi dječije igralište.

Obrazloženje:

Inicijativa za dječije igralište je od strane građana više puta upućivana prema nadležnim iz Općine Vogošća. Ovim putem je i lično podnosim drugi put i smatram da su opravdani zahtjevi stanovnika da i naselje Ugorsko ima ovakav prostor, odnosno dječije igralište gdje bi se omladina mogla okupljati i organizovati razne sportske i druge aktivnosti.

Vijećnik **Omerović Denis (u ime Kluba vijećnika SDP)** pokrenuo je slijedeću inicijativu:

2/19. Pokrećem inicijativu u ime i na zahtjev mještana naselja Svrake prema nadležnoj službi, kao i kantonalnom inspektor za vodu, da se izvrši inspekcija i utvrdi zakonitost izgradnje privatnog vodovoda na lokaciji Ravne, ul. Miholjići.

Obrazloženje:

Mještani Svraka, korisnici lokalnog vodovoda „7 vrela“, upućuju zahtjev nadležnoj službi, kao i kantonalnom inspektor za vodu, da se izvrši inspekcija i utvrdi zakonitost izgradnje privatnog vodovoda na lokaciji Ravne, ul. Miholjići. Ovaj vodovod izgrađen je 2018. godine na privatnom vlasništvu, neposredno ispod izvora „7 vrela“. Naime, nekoliko mještana je izvodilo iskopavanje bagerom, čime su u suštini tako reći pokupili manji izvor, te postavili 11 plastičnih šlaufa i izgradili jedan manji i jedan veći rezervoar. Od tada korisnici vodovoda „7 vrela“ bilježe značajan pad u količini vode, dok korisnici privatnog vodovoda koji opslužuju svega nekoliko kuća, imaju sve više i više vode, što je posebno izraženo tokom ljetnih mjeseci. U tom periodu, a sada već i počevši od mjeseca aprila, izvor „7 vrela“ presušuje, dok drugi izvor tokom čitave godine ima stabilan priliv vode. Mještani Svraka zahtijevaju da se utvrdi, da li privatni vodovod utiče na količinu vode u izvoru „7 vrela“ i da li su obavljani vodoistražni radovi, kao i da li su za izgradnju rezervoara dobijene potrebne vodne dozvole i građevinske dozvole. Također, mještani zahtijevaju da se u aktivnosti kontrole gore navedenog ne uključuje predsjednik Savjeta MZ, jer se prema njihovim tvrdnjama isti nalazi u sukobu interesa. U prilogu se nalaze fotografije koje su napravljene u trenutku dok se radilo iskopavanje i postavljanje cijevi. Molimo vas da odgovor na inicijativu dobijem u pismenom obrazloženju.

Vijećnica **Šabić Dalia (u ime Kluba vijećnika DF)** pokrenula je slijedeću inicijativu:

2/20. Pokrećem inicijativu za uvođenje produženog boravka u OŠ „Izet Šabić“ u Hotonju.

Obrazloženje:

Hotonj je jedno od najvećih naselja u općini Vogošća, s velikim brojem stanovnika i osnovnoškolaca. Trenutno učenici OŠ „Izet Šabić“ nemaju mogućnost produženog boravka u sklopu svoje škole, što roditelje često primorava da djecu upisuju u druge škole koje pružaju ovu uslugu. To izaziva dodatne troškove i logističke izazove za porodice, a istovremeno otežava rad školi, i općinskim institucijama. Cilj ove inicijative je da se do početka naredne školske godine uspostavi produženi boravak u OŠ „Izet Šabić“, da li koristeći postojeće kapacitete škole, kroz pokretanje novog projekta za adaptaciju prostora ili izgradnju novog multifunkcionalnog prostora. Uvođenjem produženog boravka:

1. Pomaže se roditeljima koji rade i nemaju mogućnost da brinu o djeci u poslijepodnevnim satima.
2. Podstiče se ostanak djece u lokalnoj školi, što doprinosi jačanju zajednice i školske infrastrukture.
3. Osigurava se sigurno i kvalitetno provođenje slobodnog vremena za učenike, s naglaskom na edukativne, kreativne i sportske aktivnosti.

2/21. Pokrećem inicijativu za uvođenje druge smjene pedijatra i dežurstva vikendom u Domu zdravlja Vogošća.

Obrazloženje:

Trenutno, Dom zdravlja Vogošća ne pruža usluge pedijatra u drugoj smjeni niti vikendom, što značajno otežava pristup zdravstvenoj zaštiti za djecu u općini. Roditelji su često primorani tražiti pomoć u drugim zdravstvenim ustanovama, najčešće u Domu zdravlja Vrazova u Sarajevu, što stvara dodatne troškove, gubi dragocjeno vrijeme i preopterećuje kapacitete tih ustanova. Glavni problem koji koči realizaciju ove inicijative jeste nedostatak kadrova, što zahtijeva hitnu intervenciju nadležnih institucija u planiranju i zapošljavanju dodatnih pedijatara. S obzirom na to da su dežurstva vikendom već uvedena u Domu zdravlja Vrazova, smatramo daje nužno primjeniti sličan model i u Vogošći, kako bi stanovnici ove općine imali ravnopravan pristup zdravstvenim uslugama. Ova inicijativa je već pokretana u predhodnom sazivu, ali se od tada nije poduzelo ništa konkretno kako bi se riješio problem, što dodatno ističe hitnost njenog ponovnog razmatranja.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

2/22. Pokrećem inicijativu za ekonomičniju i svrsishodniju kupovinu automobila za potrebe Općine Vogošća. Obzirom da su planirana budžetska sredstva u iznosu od 100.000,00 KM za kupovinu automobila za potrebe Općine Vogošća, prijedlog je da ista budu na električni pogon.

Obrazloženje:

Općina Vogošća već ima napravljene električne punjače i time bi se kupljena auta nesmetano mogla dopunjavati. Kupovinom ovih automobila naša Općina bi se deklarirala ka razvijenim i ekološko osvještenim društvima, a ujedno bi bila posticaj za druga javna preduzeća i institucije da kupuju samo električne automobile. Iz postojećeg Budžeta za 2025. godinu se planira potrošnja oko 30.000,00 KM za refundaciju goriva za automobile Općine Vogošća, te bi se na ovaj način i sam Budžet zaštitio i usmjerio u druge projekte.

2/23. Pokrećem inicijativu za transparentnost potrošnje budžetskog novca Općine Vogošća i iskrenost političkih partija i osobno svakog vijećnika u Općinskom vijeću Vogošća.

Obrazloženje:

U Općinskom vijeću Vogošća predsjednik i oba dopredsjednika su se izjasnili i aktuelna većina podržala, a i zakonom je dozvoljeno da se žele profesionalno baviti radom u Općinskom vijeću. Za Općinu Vogošća takav angažman „profesionalaca“ podrazumjeva da se obezbijedi radni prostor u kojem će se od ponedjeljka do petka raditi 8 sati, a iz Budžeta Općine Vogošća će se svakom „profesionalcu“ bruto izdvajati oko 5.000,00 KM za rad u Vijeću, komisijama i pripremama sjednica Općinskog vijeća. U Općini Vogošća ovakav način rada je postao uobičajen, jer su i predhodni vijećnici – predsjedavajući bili „profesionalci“. Građani Vogošće, ljudi koji žive i rade u Vogošći i koji učestvuju u punjenju Budžeta, traže da svaki od „profesionalaca“ nakon tri mjeseca rada u Općinskom vijeću i potrošenih 15.000,00 KM (bruto), pismeno navede šta je radio i koliko je imao aktivnosti u predhodna tri mjeseca. Navedene aktivnosti, treba da se prezentiraju Općinskom vijeću i objave na službenoj stranici Općine Vogošća. Ova inicijativa o transparentnosti trošenja budžetskog novca i iskrenosti vijećnika, treba da se stavi na glasanje, kako bi se dobila jasna slika da budžetski novac je novac građana, a ne političara.

Vijećnik **Glijiva Bego (u ime Kluba vijećnika S BiH)** pokrenuo je slijedeće inicijative:

2/24. Pokrećem inicijativu prema nadležnoj općinskoj službi da se izvrši saniranje i asfaltiranje isječenog puta u ulici Skendera Kulenovića ispred broja 85.

Obrazloženje:

U ulici Skendera Kulenovića koja se spaja sa ulicom Rosulje prije otprilike dva mjeseca vršeno je spajanje komunalne infrastrukture za određena domaćinstva. Tom prilikom na dva mjesta vršeno je sjećenje asfaltnog puta cijelom širinom. Nakon što je izvršeno spajanje komunalne infrastrukture, nije se izvršilo ponovno asfaltiranje, te se na tim mjestima usljed predhodnih padavina desila ulegnuća tamponskog nasipa i pojavila su se veća udubljenja na putu, što u velikoj mjeri utiče na normalan tok i odvijanje saobraćaja na tom putnom pravcu. Molimo nadležnu službu da prihvati inicijativu, kako bi se dio puta na kom su nastala oštećenja u što kraćem roku i sanirala. U prilogu dostavljam fotografije.

2/25. Pokrećem inicijativu na zahtjev stanovnika ulice Orahov brojeg oko broja 340, prema nadležnoj općinskoj službi, da se izvrši postavljanje zaštitne rešetke na kanalu za skupljanje otpadnih voda, a koji se nalazi u navedenoj ulici.

Obrazloženje:

Obzirom da je u ranijem periodu navedena ulica asfaltirana, te je u dijelu ulice ostavljen kanal za skupljanje otpadnih voda gdje su ugrađene zaštitne rešetke, dio rešetki je vjerovatno od strane NN osoba otuđen, što uzrokuje otežan i normalan prolaz vozilima tom ulicom. Molimo nadležnu službu da uvaži inicijativu, kako bi se mogla izvršiti ponovna postavka rešetki. U prilogu dostavljam fotografije.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA I OPĆINSKOG
NAČELNIKA

Melisa Kršo